



ERM0541







ՀՐԱՍԱԼԻՔ

ՄԸ

ԱՌԱՔԻՆՈՒԹԵԱՆ

ՍՈՒՐԲ ԿԱՅԵՏԱՆՈՍ

Գրեց ՆԵՐՍԵՍ ՑՈՎՍԵՓ. Վ. ՓԱՓԱԶԵԱՆ

«Մեծատանց որ են յասմ աշխարհի՝ պատուէր տաշիր՝ մի՛ յուսալ ի մեծութիւն սնոտի, այլ յԱստուած որ առայ մեզ զամենայն առատապէս ոի վայելել. զբարիս գործել, մեծանալ և գործովք բարութեան... գանձել անձանց հիմն բարի ի ճանդերձեալսն. ոզի բուռն հարկանիցեն զնշմարիտ էկենացն։» Ա. Ֆիմոք. Զ. 17 – 19։

ՑՊԱԳ. ԲՈՒԹԻՒՆ
Յ. Մ. ՍԵԹԵԱՆ

1934

ՀՐԱՅԱԼԻՔ ՄԸ ԱՌԱՔԻՆՈՒԹԵԱՆ

ՍՈՒՐԲ ԿԱՅԵՏԱՆՈՍ

Գրեց ՆԵՐՍԻՍ ՅՈՎԱԿԻՓ. Ա. ՓԱՓԱԶԵԱՆ

«Մեծատանց որ են յասմ առ-
հիարհի՝ պատուեր տաջիր՝ մի՛
«յուսալ ի մեծուրիւն սնոտի, այլ
«յԱսուած որ տայ մեզ զամենայն
«առատապէս ի վայելել. զբարիս
«գործել, մեծանալ գործովք բա-
«րուրեան... զանձել անձանց
«հիմն բարի ի հանդերձեալսն.
«զի բուռն հարկանիցեն զնւմա-
«րիս կենացն :» Ա. Տիմոթ. Զ.
17 – 19 :

Ա.

Կան մարդիկ որոց կեանքն եղած է ո՞չ միայն
արգիւնալից և առաքինի, այլ և բողբոջեցուցիչ արդ-
եանց և ծնուցիչ առաքինութեանց. ասոնցմէ մին է
այն զոր կը փութանք ծանօթացնել մեր սիրելի հա-
սարակութեան :

Կայետանոս Թիէնեան ծնաւ 1480ին Վիչենցա քա-
ղաքը Լոմպարտիոյ գաւառին մէջ։ Մայրը կը կոչուէր

Մարիամ Բորդա և հայրը Գասպար՝ Թիէնեանց մեծահարուստ և ազնուազարմ գերդաստանէն, որ բազմաթիւ ականաւոր անձեր պարգեւած էր Եկեղեցւոյ և Պետութեան։ Ծանօթ է շատերու Բատուայի կանոնիկուը Կայետանոս Թիէնեան, որ գրած էր Մեկնութիւններ Արիստոտելի փիլիսոփայութեան վրայ, և որ կը համարուէր իւր դարու աստուածաբաններուն իշխանը։ Ուրիշներ փայլեցան իրեւ թեմական առաջնորդ, պատուիրակ ու ծիրանաւոր, և կուսակալ Միլանի և Փոխարքայ Նաբոլիի։

Յետ մկրտութեան մայրը նուիրեց իւր նորածին մանկիկն Անարատ Կուսին Աստուածածնի, անոր մէկ պատկերին առջեւ որ ընդունեց զայն իւր հզօր պաշտպանութեան ներքն, և գերազանց շնորհքներով ցոյց տըւաւ միշտ իւր մայրենի սէրն ու գորով։ Ծատ կանուխէն փայլեցան անոր վրայ գրաւիչ առաքինութիւններ։ Իւր ծնողաց և մեծերուն կամքը նուիրական էր իրեն համար։ Կը հնաղանդէր յօժարամիտ համակերպութեամբ. ատելի էին իրեն յամառութիւն և կամապաշտութիւն, որ կուգան շատ անգամ խաթարել մանկական տիոց շնորհքն ու հրապոյր։ Հին և նոր բոլոր սուրբերուն նման գորովալիր կարեկցութիւն մը կը զզար աղքատաց և տառապելոց հանդէպ, և ամէն առթիւ կը ցանկար օգնել անոնց, ի գութ շարժելով նաև զանոնք որ ի վիճակի էին օգնելու։ Մեծագոյն հաճոյք կը գտնէր սուրբ իրերու և և եկեղեցական արարողութեանց մէջ։ Անմեղութիւն և կրօնասիրութիւն, համեստ ու բարեկիրթ վարմունք սիրելի ընծայած էին զայն ամենուն։

Անխոնջ աշխատութեամբ յաջողեցաւ ուսմանց այլազան ճիւղերու մէջ։ իմաստասէր և աստուածաբան՝ ստացաւ նաև աստիճանը վարդսւպետի ի քաղաքային

և յեկեղեցական իրաւաբանութեան : Իւր բարուց անընդութիւնը պերճախօս յորդոր մըն էր այլոց՝ բարի գործերու : Քանի՛ քանի՛ պատանիներ՝ ազգուած իւր օրինակէն՝ ետ դարձան մեղքի և կորստեան ճամբաներէ : Դեռ աշխարհական էր երբ իւր հարստութեան մի մասն գործածեց Սրբուհի Մարիամ Մագդաղենացւոյն մատուռ մը կառուցանելու, որպէս զի Ռամբացցոյ գիւղին ժողովուրդը կիւրակէ և տօն օրերը Ս. Պատարագէ չզրկուէր : Յետոյ լաւագոյն եւս ծառայելու համար Աստուծոյ, ընտրեց եկեղեցական վիճակն, հանդիսանալով տիպարն ամեն առաքինութեանց : Իւր բարեպաշտ եղբայրութեամբ, ազնուաբարոյ, վեհոզի քրիստոսասէր կենցաղավարութեամբ մանաւանդ քանիսքերով՝ բարեկարգեց ու բարոյաւորեց գրեթէ քաղաքն ամբողջ :

Բ.

Սբ. Պետրոս և Պողոս Առաքելոց գերեզմանաց ուխտագնացութեան պատճառաւ Հռոմ գնաց, ուր կը բաղձար ապրիլ առանձնացեալ և ծածուկ, հեռի մարդկային ամեն պատիւներէ : Բայց իւր բազմադիմի հըմտութիւնք՝ միացեալ ազնուականութեան և զերազանց բարեպաշտութեան՝ արդէն իսկ համբաւաւոր ըրած էին զինքն Յաւիտենական Քաղաքին մէջ : Յուլիոս Բ. Ս. Պապն ուզեց տեսնել զայն, և աւետարանական մեծ գործիչի մը ձիրքերը նշմարելով անոր վրայ, խընդրեց որ մնար քահանայապետական պալատին մէջ, ուր տրուեցաւ իրեն առաքելական նօտարի պաշտօնը :

Այն ատեն կար ի Հռոմ ընկերութիւն մը կոչուած Աստուածային-Սիրոյ, հաստատուած Ս. Սեղբեստրոսի և

Սրբուհւոյն Դորոթէայի եկեղեցւոյն մէջ։ Ընկերութեան նպատակն էր վառել Աստուծոյ սէրը հոգիներու մէջ, հեռացնելով անոնցմէ շահախնդրութիւն, հաճոյասիրութիւն, թոյնն հերետիկոսութեանց և ապականութիւնը բարուց։ Կայետանոս մտնելով այս եղբայրութեան մէջ, որ կազմուած էր քաղաքին ամենէն ականաւոր անձերէն, միացուց իւր խօսքին զօրութիւնը վարուց սրբութեան, և յորդորեց բոլոր անդամներն աշխատելու նոր եռանդեամբ իրենց կատարելութեան և կոչման վախճանին։ Այն դարու քրիստոնեայք կը հաղորդուէին դուն ուրեք, ամենէն առաքինիներն իսկ հազիւ 4 կամ 5 անգամ տարին։ Աստուծոյ ծառային յորդորներն այնչափ ազդու եղան, որ սկսան ոմանք Ս. Հաղորդութեան մերձենալ ամեն ամիս և նոյն իսկ ամեն շաբաթ։ Բարեպա՛շտ ու գովելի՛ սովորութիւն որ տակաւ ուրիշ քաղաքներու և տարածուեցաւ, և որ արդ թանկազին օրհնութեանց աղբիւր մը եղած է կաթողիկէ երկիրներու համար։

Այսչափ եռանդն ու հոգեշան գործունէութիւն արժանի ըրին զայն կոչուելու քահանայական աստիճանին, ուր պիտի փայլէր իբրև սերովբէ՛ աստուածային սիրով բոցովառ։ Իւր մտերմութիւնք երկնից հետպիտի լինէին աւելի սերտ ու խորհրդալից։ Ս. Ծննդեան գիշեր մը գտնուելով Աստուածածնի ամենէն մեծ եկեղեցւոյն մէջ, (որ կը կոչուի Սանդա-Մառիա-Մաճորէ), Յիսուս իբրև նորածին մանկիկ երեւցաւ իրեն, և Ս. Կոյսը դրաւ իւր աստուածային Որդին անոր մաքուր բազկացը մէջ։ Ինքն իսկ յոյտնած է այս հրաշալի տեսիւքը իւր Լառուրա քրոջ, որ մայրապետ էր Ս. Խաչի վանուց մէջ, ի Պրէշիա։

Իւր մօր մահն ստիպեց զայն դառնալ ի Վիչենցա,

ուր անդամակցեցաւ Ս. Հերոնիմոսի ընկերութեան :
իւր ազգականք չվարանեցան բուռն կերպիւ յայտնել
իրենց զայրոյթն ու դժգոհութիւն . որովհետեւ սոյն եղ-
բայրութիւնը կազմուած էր պարզ արհեստաւորներէ և
ստորակարգ անձերէ . բայց ի զո՞ւր : Սուրբը որ
աշխարհային փայլ ու ցոյց չէր փնտոեր բնաւ , անլսող
մնաց ընդունայն առարկութեանց , ու մտադիւր և ու-
րախամիտ ընդունեց իւր բաժինն Յիսուսի անարգան-
քէն ու խաչէն : Դժուար է թուել մի առ մի բոլոր
այն առաւելութիւնները, զոր վայելեց այս համեստ
ընկերութիւնը շնորհիւ ծառային Աստուծոյ : Հոգեւոր
բանախօսութիւններ կ'ընէր ստէպ . իւր խօսքն՝ ար-
ձագանգ խորին համոզման և լի օծութեամբ , կը յուզէր
խորապէս զամէնքը . ո'չ ոք կը փորձուէր զլանալ ինչ
որ կը պահանջէր իւրաքանչիւրին ուղղութեան և հո-
գեւոր յառաջդիմութեան համար : Երկնազդեցիկ պեր-
ճախօսութիւն մը կը հոսէր իւր մեղրածորան շրթնե-
րէն երբ կը ճառեր քնարերգակ բանաստեղծի մը խան-
դավառութեամբ անհուն սիրոյ մասին , զոր մեր եր-
կըրպագելի Փրկիչը կը ցուցնէ մեզ մանաւանդ Ամե-
նասուրը Հաղորդութեան մէջ , ո'չ միայն տալով զին-
քը կերակուր մեր հոգիներուն , այլ նաև մնալով տիւ
և գիշեր ներկայ մեր նուիրական տապանակներուն մէջ ,
և ամեն օր Գողգոթայի անմահ , հաշտարար , քաւիչ և
տիեզերակեցոյց Զոհը նորոգելով մեր սրբաշուք խորան-
ներուն վրայ :

Գ.

Քաջ գիտելով թէ ո'ր աստիճան գութն հաճոյ է Աս-
տուծոյ , Ս. Հերոնիմոսի ընկերութիւնը միացուց անբու-
ժելիներու հիւանդանոցին , ուր յաճախ կը կատարէր
դիւցազնական դործեր խոնարհութեան , համբերու-
թեան և եղբայրասէր անձնանուիրութեան . իւր դրամին

մեծ մասը կը գործածէր անոնց պիտոյից : Գերբնական մտածութեամբ և ամէն մի հիւանդի վրայ տեսնելով զՅիսուս չարչարեալ, կը յաղթէր բնութեան զզուանքին, և ամենէն պժգալիներն իսկ կը խնամէր անձամբ, անոնց անկողինները շինելով, ժահահոտ վէրքերը դարմանելով, լուալով ձորձերն ու ամանները, և մանաւանդ պատրաստելով մահամերձներն ընդունելու պարտ ու պատշաճ տրամադրութեամբ սուրբ խորհուրդները խոստովանութեան, թոշակի և վերջին օժման :

Եւ որովհետեւ սուրբերը չեն վստահիր իրենց անձին, լաւ կը ճանչնան արժէքն հնազանդութեան, ու կը բաղձան բարձրագոյն լոյսերով առաջնորդուիլ յամենայնի, կայետանոս իրեն հոգեւոր առաջնորդ ընտրեց զՀ. Յովհաննէս. Մկրտիչ Գրէմեան, յՈւխտէն սրբոյն Դոմինիկոսի, որ Հոգւով Սրբով ներշնչեալ, հրամայեց թողուլ իւր բազմօգուտ զբաղումներն ի Վիչենցա, և մեկնիլ դէպի Վենետիկ: Կայետանոս հակառակ իւր բարւոյ անզուսպ տենչանքին, նախամեծար համարեց հնազանդիլ քան հետեւիլ անձին կամաց, և իսկոյն մեկնեցաւ ուր որ զինք կը կոչէր ձայնն Աստուծոյ :

Սոյն դիւցազնական հնազանգութիւնն ապագայ մեծագոյն և անհաշուելի բարիքներու նախերգանքնեղաւ, ինչպէս եղած է յաւէտ՝ սիրայօժար և անձնուրաց հնազանդողներու համար: Հոս ալ իւր բնակութիւնն հաստատեց նորակառոյց հիւանդանոցին մէջ, տիւ և գիշեր զոհելով իւր հանգիստն անօգնական թշուառներու, և անոնց մատուցանելով հոգեւոր և ժամանակաւոր յոգնազան բարիքներ, յորս առաջնակարգ տեղ մը կը գրաւէ իւր յօրինած իմաստուն կանոնագիրը: Այնչափ օգտակար եղաւ իւր դերը սոյն գթու-

թեան յարկին, որ համարուեցաւ ոչ բարեկարգին և
եթ, այլ և հիմնադիրն անոր :

Առանց ի նկատի ունենալու հիւանդանոցին տա-
ժանելի աշխատութիւնները, քաղաքէն վշտակիր ան-
ձինք յոգնախուսն կը դիմէին իրեն : Զոմանս կը սփո-
փէր, զոմանս կը պաշտպանէր ընդդէմ հարստահարու-
թեանց, այլոց կ'ընծայէր դարման հոգիւոր ու մարմ-
նաւոր պիտոյից : Իբրև քաջ բարոյագէտ-աստուածա-
բան խղճի կնճոտ չնդիրներու կուտար ողջամիտ և
արդորրաւէտ լուծումներ : Ամեն բարի կամքերու հա-
մար, դիմել իր գթասիրտ իմաստութեան ապահովա-
գոյն միջոցն էր միսիթարուելու կամ լաւագոյն լինելու :

Հակառակ քրտնաթոր և հանապազօրեայ վաստա-
կոց, իւր սնունդն էր շատ անգամ հաց ու ջուր և եթ :
Քահանայապետի նօտար և տղնուատոհմ դասակար-
գէ ըլլալով հանդերձ, ամենապարզ կերպասէ էր իւր
զգեստը, գիւղացի քահանայի մը նման : Բայց Աստ-
ուածային օրհնութիւնք առատայորդ կը զեղուին իւր
վրայ. ո՛րչափ ճոխ ու շողշողուն էր այն՝ զարդերով,
որոնք չեն փճանար գերեզմանին եզերքը : Ապաքէն
մահացուցման, խոնարհութեան և պարզասէր համես-
տութեան սոյն սքանչելի դասերն ապարդիւն չմնացին
երբեք . վենետիկեանք՝ աշխարհական ու կղերական՝
փութացին օգտուիլ այն օրինակէն, որ բարձրէն կու-
գար իրենց, և իրական բարեկարգութիւն ու բարուց
մաքրութիւն երկնային հաճութեանց արժանի ըրին
քաղաքն համօրէն : Բայց ո՛չ մի յաջողութիւն, ո՛չ մի
յաղթանակ կընար երբեք շլացնել ծառայն Աստուծոյ,
ու երբ իւր հոգեկիր խոստովանահայրն հրամայեց՝ երկ-
րորդ անգամ մը եւս թողուլ իւր բարեսէր առաքելա-
կան ձեռնարկներն, ու երթալ ի Հռոմ, անմիջապէս

հնագանդեցաւ նորընծայի մը հլու հպատակութեամբ :

Հոս գտաւ վերստին Աստուածային-Սիրոյ եղբայրութիւնն , որոյ բոլոր անդամք նշանաւոր էին ծնընդեամբ , գիտութեամբ , հոգւով երկիւղածութեան կամ կարեւոր պաշտօններով : Ամենքն ալ —թուով վաթսուն — բորբոքած էին միեւնոյն եռանդով ու քաջութեամբ՝ մեղքի դէմ կոռւելու և քրիստոնէական առաքինութիւնները վերահաստատելու և աճեցնելու :

Դ.

Բարւոյ թշնամին ալ չէր ննջէր , որոմը կը ցանէր մերթ ընդ մերթ բարի սերմերուն մէջ : Ուստի ընկերութեան գլխաւոր չորս անդամներուն ներշնչեց Աստուած հիմնել Միաբանութիւն մը կանոնաւոր կղերիկոսաց , որոնք Առաքելոց ժամանակին նման ապրելով աղքատութեան սիրով , անփառասէր պարզութեամբ ու երկնատենչ սրբութեամբ՝ մշտաբարբառ և ազդույորդոր մը պիտի լինէին ընդհանուր կղերին բարւոքման ու բարեկարգութեան . և կղերը բարոյապէս բարձրանալով , կարող պիտի լինէր թումբ կանգնել ընդհանուր վատթարութեան ու ապականութեան դէմ , և այսպէս հեթանոսական բարքերն անհետ լինելով տակաւ առ տակաւ , քրիստոնէական բարուց անարատութիւնը վերստին պիտի փայլէր Աստուծոյ մը անուամբ ու արեամբ ազնուացեալ ժողովուրդներու վրայ :

Անոնց առաջինն է Յովհաննէս-Պետրոս Գարաֆֆա , այն ատեն եպսկ . Թէադէի , Նաբոլիի թագաւորութեան մէջ , յետոյ արքեպս . և կարդինալ , ու Պապ Պողոս Դ . անուամբ - 1555ին . Մարսէլ Բ . ի մահէն վերջ : Երկրորդն է Կայետանոս Թիէնեան , որոյ կենսագրութիւնը կ'ընենք համառօտիւ : Երրորդն է Պողոս Գոնսիլիէրի , ազնուատոհմ գերդաստանէ , այնչափ նշանաւոր սրբութեամբ որչափ խոհեմազարդ իմաստութեամբ :

Չորրորդն է Բոնիփակիոս տը Գոլլէ, Խտալիոյ Աղեք-
սանդրիա քաղաքէն, որ իւր զերընտիր ձիրքերով ար-
ժանի եղաւ գործակից լինելու այսպիսի հոյակապ անձ-
նաւորութեանց :

Թէ աղէի սրբաշունչ եպիսկոպոսը որ արցունք կը
թափէր խորհելով իւր ժամանակի բարոյական անկում-
ներուն ու զեղծմանց, անհուն հաճոյքով լսեց այն ներ-
շընչութիւնը զոր ի Վենետիկ իսկ ունեցած էր նաև
Կայետանոս, և կը սպասէր բարեդէպ առիթի մը զայն
ի գործ դնելու համար և Խնդրեց ուրեմն խոնարհու-
թեամբ որ զինքն ալ ընդունին նոր Միաբանութեան
մէջ. բայց Կայետանոս մերժեց նախ, չհաւանելով որ
այնչափ արդիւնաւոր ու եռանդնալից վիճակաւոր մը
թողուր իւր թեմը կրօնաւոր ըլլալու համար, Գերտ-
պայծառը չվհատեցաւ, կրկնեց իւր թախանձանքը, և
սուրբին առջև ծնրադիր, զայն պատասխանատու նկա-
տեց իւր հոգւոյն, եթէ այս շնորհքը զլանար իրեն:
Հարկ եղաւ տեղի տալ սոյն ջերմագին տենչանաց առ-
ջև: Եւ չորսն ալ 1524 Գիւտ Խաչի տօնին (3 մայիսի
ըստ լատինաց) ներկայանալով կղեմէս Է. րդի, Խընդ-
րեցին որ հաճի ընդունիլ իրենց հրաժարականները և
հաւանիլ նոր Միաբանութեան մը հիմնադրութեան:
Գերագոյն Քահանայապետը չուզեց ընդունիլ Յ. Պ.
Գարաֆֆայի հրաժարականը, բայց լսելով անոր պատ-
ճառաբանութիւնները միացեալ պաղատագին աղերսա-
նաց, հաւանեցաւ: Ի վերայ այսր ամենայնի դեռ դըժ-
նաց, հաւանեցաւ: Ի վերայ այսր ամենայնի դեռ դըժ-

ուարութիւնք բոլորովին վերջ գտած չէին. նոր Միա-
բանութեան ծրագիրն հեռի էր համակրութիւն զտնելէ
Կարդինալաց Ժողովոյն մէջ, որովհետեւ այս եռանդուն
հիմնադիրք չէին շատանար ապրելով և թառանց սեպ-

հականութեան և որոշ եկամտից , Ա. Փրանկիսկոս Ասիզացւոյն նման , այլ նաև խստիւ կ'արգելուին մուրալ , և ինքզինքնին կը պարտաւորէին ոչինչ խնդրել երբեք , և սպասել աստուածային Նախախնամութենէն միայն՝ ինչ որ հարկաւոր էր իրենց ապրուստին , զգեստից և բնակութեան : Ծիրանաւորաց մեծամասնութիւնն այսպիսի վանքերու հիմնուիլն ու շարունակուիլը գրեթէ անկարելի կը նկատէր : «Ի՞նչպէս ենթաղըել , կ'ըսէին , թէ ամբողջ վանքեր կարենան ապրիլ առանց ստացուածքի , առանց ձեռքի աշխատութեան նպաստից և առանց բան մը խնդրելու : Ո՞վ պիտի գիտնայ անոնց պէտքերը , ո՞վ պիտի գուշակէ անոնց կարօտութիւնը : Եւ ամենէն ողորմած անձինք՝ անտեղեակ անոնց չքաւորութեան պիտի չթողո՞ւն զանոնք որ պակսին շարունակ կեանքի ամենէն անհրաժեշտ բաներէ : »

Բայց թէադէի եպիսկոպոսը և կայետանոս մի առ մի հերքեցին այս տուարկութիւնները : — «Միթէ Առաքեալք եկամուտ ունէի՞ն կամ դռնէ դուռ կը շրջէի՞ն մուրալով : Հաւատացելոց կամաւոր և ինքնայօժար նուէրները կը գոհացնէին անոնց անհրաժեշտ պէտքերը : Ո՞վ կրնայ կասկածիլ թէ Աստուած մը թերանայիւր բացայայտ խոստումին . «Խնդրեցէ՛՛ նախ զարգայութիւնն Աստուծոյ եւ զարդարութիւն նորա , եւ այդ ամենայն յաւելցի ձեզ : » (Մատթ . Զ . 33.)

Ե.

Դժուարութիւնք հարթուելէ վերջ , իսչվերացի տօնին , 14 Սեպտ . 1524 , հրաժարելով իրենց բոլոր ամսաթոշակներէն և ստացուածքներէն Հոռմ Ս. Պետրոսի Մայր - Եկեղեցւոյն մէջ իրենց ուխտերը կատարեցին Ս. Պապին ներկայացուցչին , Գաղերդայի եպիսկոպոսին առջեւ : Հաւանութեան կոնդակը շնորհուած էր արդէն Յունիս 25ին , իրենց տրուելով բացարձակ

և անվերապահօրէն Կանոնաւոր Կղերիկոսաց պաշտօնական անունը : Առանց յապաղելու ձեռնարկեցին Մեծաւորի ընտրութեան, և ընտրուեցաւ, Յ. Պ. Գարաֆֆա , որուն պահած էր Ս. Պապը Թէադէի եպիսկոպոսի տիտղոսը . աստի կոչուեցան իւր կրօնաւորք մինչև այսօր Թէադինեան (Théatins) , որ հոմանիշ նկատուեցաւ շատ անգամ մաքրակրօն և անստղիւտ եկեղեցականի :

Թէադինեանց գլխաւոր վախճաններն են . ա . Բարի օրինակ տալ կղերին և զեղծումները բառնալու ջանալ . բ . Տիեզերապէս ատելի եղած աղքատութիւնն (և այս , ափսո՞ս , Բեթղեհէմէ և Գողգոթայէ 15-20 դար վերջ) սիրելի ընծայել ամենուն , մանաւանդ քահանայից , և յաւելու հոգիներու մէջ վստահութիւնն աստուածային Նախախնամութեան . գ . Հոգ տանիլ եկեղեցեաց և խորաններու վայելչութեան և բարեզարդութեան , ինչպէս և որբազան արարողութեանց կանոնաւորութեան և վեհութեան , որոց անփոյթ կատարումը զէնք մ'էր նորազանդից ձեռքը զանոնք եպերելու իրեւ աւելորդապաշտութիւն . դ . Յորդորել հաւատացեալներն ստէպ և պատշաճ տրամադրութեամբ ընդունելու սուրբ խորհուրդները . ե . Քարոզելու Աստուծոյ խօսքը հմտալից և ջերմեռանդ կերպիւ , վտարելով ի սպառ ամեն սեթեւեթ և ցուցամոլութիւն , զ . Այց ելնել հիւանդաց , և մահամերձները զօրացնել ընդդէմ փորձութեանց և մահուան երկիւղի . ի . Մինչև վերջին վայրկեան մօտ դտնուիլ ոճրագործ մահապարտներու , զանոնք յաւիտենական պատիժներէ փըրկելու համար . ը . Մարտնչիլ ընդդէմ հերձուածի և հերեսութեան՝ Եկեղեցւոյ միութիւնն ամեն բանէ նախադաս համարելով :

Նպատակի և միջոցներու փոքր տարբերութեամբ՝ ուրիշ հոգեշնորհ Միաբանութիւններ եւս կազմուեցան, թէաղինեանց օրինակով։ Սուրբ Հերոնիմոս էմիլեան հիմնեց 1530ին Սումասգի Միաբանութիւնն, որբերու և դաստիարակութեան միջոցներէ զուրկ աղքատիկ տըղայոց համար։ Ա. Անտոն-Մարիամ Զաքարիա, Միլանի քաջ բժիշկներէն մին, որ հրաժարելով իր շահաբեր ասպարէզէն քահանայ ձեռնադրուեցաւ, և հիմնեց 1533 ին Ա. Պողոսի կամ Բառնաբասեանց Միաբանութիւնը՝ մանաւանդ բարձր դասակարգի պատանեաց ուսման և դաստիարակութեան համար։ Ա. Իգնատիոս տը Լոյոլա, սպանիացի ազնուական սպայ որ հրաժարելով զինուց ասպարէզէն, հիմնեց 1534ին Յիսուսեանց պանծալի Միաբանութիւնն այնչափ սիրելի քրիստոսասէր հոգիներու որչափ ատելի Քրիստոսի թշնամեաց։ Նպատակն է դպրութիւն, գիտութիւն, համալսարանի ուսուցչութիւն, քարոզութիւն քրիստոնեայ և ոչ-քրիստոնեայ երկիրներու, նոյն իսկ մարդակեր վայրենիներու մէջ։ Ա. Փիլիպպոս Ներեան 1564ին հիմնեց Աղօքատեղւոյ (*Oratoriens*) կամ Փիլիպպեան կրօնաւորներն, որոց գլխաւոր նպատակն է մզում տալ պարզ և ժողովրդային քարոզներու և աղօթք ու ջերմեռանդութիւն աւելցնել ընկերութեան ամեն դասակարգերուն մէջ։ Ա. Փրանկիսկոս Գարաչոլեան, հիմնեց 1588ին կանոնաւոր կրտսերներու Ուխտը, գրեթէ վերոյիշեալ նպատակով։ Ա. Գամիլ տը Լէլիս հիմնեց 1591ին Հիւանդաց պատօնեայները կամ Խաչակիրները (*Crucifères*) իրենց կուրծքին վրայ կարմիր խաչ մը կրելնուն համար։ Իրենց առաջին անունը կը յայտնէ նաև իրենց գլխաւոր նպատակը։ Ա. Յովսէֆ Գալազանցիոյ 1621ին հիմնադիրն է Ուխտին Բարեպատ Դպրոցաց, և Երանելի

Յովհաննէս Լէոնարտի 1628ին հիմնադիր Ուխտին
Աստուածամօր, որոց նպատակն է հասարակ ժողովուր-
դին տղայոց բարեպաշտ կրթութիւնը :

Թէադինեանք գործօն կեանքի միացնելով նաև
հայեցողական կեանքը, օրինակելի եռանդով և կանո-
նաւորութեամբ շարունակեցին աշխատիլ թէ՛ իրենց
անձին սրբութեան և թէ՛ հոգիներու փրկութեան : Ի
մասնաւորի փայլեցաւ իրենց վեհոգի անձնուրացու-
թիւն համաձարակ ախտի մը միջոցին, որ ահ ու դող
կը սփոէր իտալիոյ այլեւայլ քաղաքները : Գիշեր ու
ցերեկ կը գտնուէին հիւանդանոցներու ապականեալ
մթնոլորտին մէջ, ախտաժէտներու սնարը, անխոնջ
հոգ տանելով հոգիներու և մարմիններու առողջութեան,
ու բարի մահուան պատրաստելով անբուժելիները : Այս
եղբայրասէր աստուածասէր կղերականաց կեանքն այն-
չափ շինիչ և բարերար՝ ընդհանուր հիացում կը պատ-
ճառէր, և Հոռմի մէջ Թէադինեան կը կոչուէին անոնք
որոց վրայ կը փայլէին բարձր առաքինութիւնները :
Յոյժ արժանաւոր անձինք անոնց միացան, և այսպէս
օրքան զօր աճեցաւ թիւը սոյն առաքելաշնորհ քա-
հանայից, որոնք ունէին մի շահ, մի կամք, մի փա-
ռասիրութիւն, — Սիրել զԱստուած և անոր սուրբ սէրը
սփոել հոգիներու մէջ :

Զ.

Եւ որովհետեւ Յիսուսի աշակերտք առանց խաչի
չեն կրնար ապրիլ ու գործել այս աշխարհի մէջ, իւր
հայրենեաց դաւաճան ֆրանսացի սպարապետ մը, Կա-
րոլոս տը Պուռպոն, իւշնոմի բանտկի մը գլուխն ան-
ցած, մտաւ ի Հոռմ, և սկսաւ գործել անլուր բռնու-
թիւններ, սպանութիւն, սրբապիղծ անբարշտութիւն-
ներ : Այդ բանակը կազմուած ըլլալով բարբարոսներէ,
հերետիկոսներէ, և Ա. Աթոռոյ թշնամիներէ, ո՛չ մի

վատութեան առջև կանգ կ'առնուին ,ամենէն նուիրա .
կան բաները անարգելով , և վայրագ ազահութեամբ
հարստութիւն փնտոելով նոյնիսկ գերեզմաններու մէջ :
Տուները մտնելով ո'չ միայն կը կողոպտէին ամէն ինչ,
այլ նաև ամենէն յարգելի ու պատուաւոր քաղաքա-
ցիները տանջանաց կ'ենթարկէին , իբրև թէ ծածկուած
գանձերը մէջտեղ հանելու համար : Ա . Կայետանոս որ
մեծահարուստ կոմսի համբաւով ճանչցուած էր , աւելի
եւս անգթութեանց նշաւակ եղաւ , այդ մարդակերպ
ճիւաղներու կողմանէ՝ բանտ նետուելով և ծեծուելով :
Ու երբ ազատ արձակուեցաւ՝ այն աստիճան տկարա-
ցած էր որ հազիւ կրցաւ դուրս ելնել Հռոմէն , և իւր
ընկերաց հետ երթալ Վենետիկ , ուր ընդունուեցան Ա .
Նիկողայոս Տոլենտեանի վանքը : Հոս եւս առիթը ու-
նեցաւ Կայետանոս ի գործ դնելու դիւցազնական ա-
ռաքինութիւններ , քաղաքը ժանտախտի և յետոյ սո-
վու մատնուած ըլլալով : Իւր ձեռօք իսկ կը դարմանէր
ամենէն պժգալի վէրքեր , ո'չ մի օգնութիւն կը զլա-
նար տառապելոց , և իւր օրինակը գրգիռ մ'էր մեծա-
տանց աղքատասէր և առատաձեռն ըլլալու :

Թէադէի եպիսկոպոսին մեծաւորութեան երեք
տարիներէն վերջ , Կայետանոս ընտրուեցաւ մեծաւոր
միաձայնութեամբ , հակառակ իւր ընդդիմազրութեան :
Սքանչելապէս բեղմնաւոր եղան իւր օրերը նաև այս
պաշտօնին մէջ : Ո'չ մի վայրկեան կ'անցընէր պա-
րապ , չարաչար աշխատելով վանքէն ներս և դուրս :
Իւր խոնարհ ու մահացեալ կեանքը , փոյթեռանդն յա-
րատեւութիւնը խոստովանանք լսելու , հիւանդներն
այցելելու , կարօտելոց օգնելու , Աստուծոյ խօսքը քա-
րոզելու , իւր վսեմ անշահախնդրութիւնը խորին տը-
պաւորութիւն գործեցին կղերին ու աշխարհականներու

վրայ, որք յօժարութեամբ ընդունեցին մտնել աւետարանական բարուց անձուկ ճամբուն մէջ :

Մեծաւորութեան շրջանն աւարաելէ վերջ, հարկ եղաւ մեկնիլ դէպ ի Վերոնա, ուր պայքար կը մզուէր օրինասէր Առաջնորդին դէմ, որ իմաստուն կանոններով կը ջանար զեղծումները բառնալ, և կը կոչէր իւր հօտը պարտուց հաւտտարիմ կատարման : Կայետանոսի երեւումն քաղաքին մէջ՝ ամեն ինչ կերպարանափոխ ըրաւ. յամառութիւն և կամապաշտութիւն հրաշիւք իմն անհետ եղան. վիճակաւորին օրինաւոր պահանջումներուն գոհացում տրուեցաւ : Վերոնա ծաղկեցաւ բարեպաշտութեամբ և բարի գործքերով : Ու երբ մի օր Ս. Կարոլոս Պորրոմէոս ուղեց բարեկարգել Միլանի թեմը, Վերոնայի բարեկարգութիւնն իրեն օրինակ ընտրեց :

Քիչ յետոյ պէտք եղաւ Նարոլի երթալ նոր վանք մը հիմնելու համար : Ամառուան սաստիկ տաքերուն՝ այս ուղեւորութիւնը նուազ տաժանելի ընելու դիտաւորութեամբ, մեծաւորը որ կրկին թէազէի եպիսկոպոսն էր, առաջարկեց ուղեկից ընտրելու իրեն՝ ամենէն հաճելի կրօնաւորներէն մին : «Ի՞նչ, պատասխանեց սուրբը, ընտրե՛մ ինձ ամենէն հաճելի ընկեր մը...: Ո՛չ, հնազանդի՛լ՝ այսպէս չըլլար : Ընդհակառակն կը խնդրեմ իմ Փրկչէս (դառնալով դէպի խաչելութիւն) Ներշնչել ձեր Գերապայծառութեան որ իմ ճաշակիս ու կամքիս ամենէն անյարմարը չնորհէք ինձ :»

Է.

Տ' Որբիտոյ կոմսը քաղաքէն դուրս վանք մը պատրաստած էր նոր Միաբանութեան համար . ու հարկ եղաւ մէկ քանի ուրիշ կրօնաւորներ եւս բերել տալ Վենետիկէն : Սակայն կոմսը բնաւ համակրութիւն չըգգալով Կայետանոսի ծայրայեղ աղքատութեան, առա-

Հարկեց օժտել նորակազմ հասարակութիւնը դրամագըլխով և կանոնաւոր եկամուտով։ ինչ որ ծնունդ տըւաւ հետագայ վիճաբանութեան։ «Վսեմաշուք Տէր, շնորհակալ ենք ձեզ ձեր առատաձեռն վեհանձնութեան համար, սակայն դրամագլուխ կամ եկամուտընդունիլ անկարելի է մեզ, մեր կանոնին բոլորովին հակառակ ըլլալով։»

«—Բայց բազմաթիւ հասարակութիւն մը չի կրնար ապրիլ ընդ երկար լոկ կամաւոր նուէրներով։ հարկ անհրաժեշտ է որոշ եկամուտ մը ունենալ։ Պէտք չէ վստահիլ ժողովրդոց առաջին խաղավառութեան։ շուտով կը մարի այն։»

Կոմսը տեսնելով թէ չկրնար համոզել սուրբը, ուրիշ կրօնաւորներ դրկեց անոր՝ համոզելու դիտաւորութեամբ։ Որոց հարցուց կայետանոս։

«Ճնորհ ըրէք, Գերպ. Հարք, ըսելու ինձ թէ ի՞նչ ապահովութիւն ունիք ստանալու տարուէ տարի ձեր հասք ու եկամուտները։» «— Ապահով ենք, որովհետե ինչք ու ստացուածք մեզ կը վերաբերին, և անոնց օրինաւոր սեպհականատէր մենք ենք։»

«Բայց ո՞վ ձեզ կ'ապահովէ թէ ձեր վարձակալները կանոնաւորապէս պիտի վճարեն ձեզ, և թէ ձեր կալուածոց և ժառանդութեանց պտուղները պիտի չիւրացնեն։» «— Որովհետե օրինաւոր դաշինք և պայմանագրութիւններ ունինք, որոնցմով կրնանք պարտաւորել զանոնք վճարման։»

«Ո՞հ, մեր եկամուտք ո՞րչափ լաւագոյն հաստատուած են, վասն զի կը յենուն ո՛չ մարդոց կնիքին և գրուածոց վրայ, այլ Աստուծոյ իսկ խօսքին ու խոսմանը վրայ, որ մեզ կ'ըսէ Ս. Աւետարանին մէջ։ ԱՄի՛ հոգաք թէ ի՞նչ պիտի ուտէք, ի՞նչ պիտի ըմպէք,

ի՞նչ պիտի զգենուք . որովհետև գիտէ ձեր երկնաւոր Հայրը թէ բոլոր այս բաներուն պէտք ունիք , ինդրեցէք ուրեմն նախ Աստուծոյ թագաւորութիւնը և անոր արդարութիւնը , և մնացեալ կարեւոր բաները պիտի տրուին ձեզ : »

Եւ կոմսին յարեց Կայետանոս . «Մեր Միաբանութիւնը Աստուծոյ խոստումներուն ստուգութիւնը փորձով գիտէ ի Վենետիկ տարիներէ ի վեր: »

Կոմսը . «Վենետիկ ուրիշ Նաբոլի ուրիշ . Վենետիկոյ մէջ քիչ պերճանք կայ , և շատ հարստութիւն , մինչդեռ Նաբոլիի մէջ քիչ հարստութիւն կայ և շատ պերճանք : »

Սուրբը տեսնելով թէ կոմսը չհամոզուիր , ըստ օր մը իւր ընկերաց . «Եթէ անգամ մըն ալ զայ մեր բարեկամը , և պնդէ . մեր աղօթագիրքն առած՝ մեկնինք այս վանքէն , և իրեն յանձնենք բանալիները : »

Եւ երբ կոմսը դարձեալ կը ներկայանայ իւր ծրագրով , ամենքն ալ դուրս կ'ելլեն վանքէն , բանալիներն յանձնելով իրեն , որ զարմացած կը հարցնէ . «Բայց ո՞ւր կ'երթանք: »

« – Կ'երթանք տեսնելու թէ Վենեկոյ Աստուածը Նաբոլիի Աստուածը չէ: »

Իսկ բարեկամք չթողուցին որ այս սուրբ կղերիկոսք հեռանան քաղաքէն : Եւ ընդհուպ անոնց չինիչ ներկայութեան պտուղներն սկսան վայելել ամենքն ալ : Շոայլութիւն և պերճանք պակսեցան , բարքործութիւնն աւելցաւ կայետանոսի ներքին սրբութիւնը կը ճառագայթէր նաև իւր դէմքին վրայ , տեսնել զայն ու չբաղձալ լաւագոյն ապրելու , գժուար էր : Արդարև մին էր անոնցմէ , զորոց կը խօսի մեծ Հայրապետն Ս . Ամբրոսիոս , «կան մար-

դիկ որոնք բարիք կը գործեն լոկ իրենց ներկայութեամբն իսկ :»

Նոյն ժամանակները ընդունեց նաև Աստուծմէ հըրաշագործութեան պարզեւը : Կրօնաւորի մը ոտքին վէրքը շատ ծանր էր, և բժիշկներն անհրաժեշտ դատած էին վիրաբուժական գործողութիւն : Ոտքին կապերը քակելով, վէրքը համբուրեց և կարճ աղօթք մը ըրաւ : Հիւանդը հանգիստ քունէ մը վերջ՝ կատարելապէս ապաքինած էր, վէրքի հետքն անգամ չմնալով : Ուրիշ կրօնաւոր մը որ կը տառապէր մտային խանգարումէ, բուժուեցաւ նաև Սուրբին աղօթքով :

Կայետանոս ուրիշ մեծ ծառայութիւն մը եւս մատոյց Ս. Եկեղեցւոյ : Երեք նենգամիտ չարագործք, գայլեր ոչխարի կերպարանօք՝ մոլորութեան սերմեր կը ցանէին ժողովուրդին մէջ, որ մոռնալով Առաքելոյն վճիռն ընդդէմ ստոյ պաշտօնէից, «Որք ունիցին զկերպարանս աստուածպաշտութեան, և ի զօրութենէ անտի նորա ուրացեալ իցեն», երեւոյթներէ կը խարուէր, և ի վտանգի էր ուղիղ հաւատոյ երկնային գանձը կորսնցնելու : Յովհաննէս Վալտէս, որ Սպանիայէն եկած էր Նաբոլի, և գործակից չարասէր թշնամւոյն կը ջանար միտքերը պղտորել : Պետրոս Վէրմիլի, այրճարտարախօս, բայց դասալիք Ս. Օգոստինոսի կանոնիկոսաց կարգէն, և ապստամբ ընդդէմ Եկեղեցւոյն Քրիստոսի : Բեռնարդինոս Օչէն, դարուն յաջող քառողիչներէն մին, որ եղած էր մինչև իսկ ընդհանրական մեծաւոր Վեղարաւորաց (Capucins) կարգին, զոր սնապարծութիւն, փառամոլութիւն և անպարկեշտութիւն նետած էին ի վիհ հերետիկոսութեան : Այնպիսի վատշուէր եռապետութիւն մը աղէտք էր ո'չ միայն նաբոլիի, այլ և ամբողջ իտալիոյ համար : Բարեբախ-

տօրէն Կայետանոս և իւր կարգակիցն Հայր Յովհաննէս Մոռինոն, շուտով նշմարեցին վտանգը, և առանց վայրկեան մը իսկ կորսնցնելու, զրեցին Թէադէի եպիսկոպոսին, զոր Պօղոս Գ., Կղեմէս է ի յաջորդը կարտինալութեան բարձրացուցած էր քիչ առաջ Երեք ուխտագրուժ խարերայներն հազիւ իմացան զայս, փութացին հեռանալ իտալիոյ սահմաններէն, իրենց սպառնացող պատիժներէն վախնալով։ Ատելի նոյն իսկ ոչ կաթողիկէից, երեքն ալ չարամահ կորսուեցան, երկնից արդարութենէն պատժուած, ինչպէս կը դիպի ըստէպ անօրէն ու անզգամ ուրացողներու։

Ուղղափառները տեսնելով Սուրբին այս նոր ծառայութիւնը, կրկնապատկեցին իրենց սէրն ու վստահութիւն։ Բայց նա գովեստից ու ծափահարութեանց առջև միշտ աւելի եւս կը խոնարհէր, ու անձնասիրութեան և ցուցամոլութեան ստուերն անգամ չկրցաւ մօտենալ իւր համեստ ու վսեմ հոգւոյն։ Փառքի և անարգութեան մէջէն կ'անցնէր նա անվրդով, միշտ նոյն, խիստ ու անողոք իւր անձին, ներողամիտ և հեղաբարոյ, գթասիրտ և լի բարութեամբ հանգէպ այլոց։ Մասնաւոր ապաշխարանքներն իսկ՝ տարիներու հոլովմամբ՝ չէր ուզէր նուազեցնել, խարազն և ցփսի անբաժան էին իրմէժուժկալ ու սակաւապէտ՝ իւր կեանքն ամբողջ կրնար համարուիլ ծոմապահութիւն մը մշտատե։ Յաճախ ինքզինք կը ձաղկէր մինչև ցարիւն, վասն զի մարմինը կը նկատէր իբրև իւր մեծագոյն թշնամին, մտածելով առաքելուշունչ պատգամին։ «Եւ որ քրիստոսեանքն են, զմարմինս իւրեանց ի խաչ հանեն կարեօք և ցանկութեամբք հանդերձ։»

Ոչ ոք ունէր աւելի նախանձ Աստուծոյ փառաց և

հոգիներու փրկութեան : Այս վսեմ նպատակին համար կ'ապրէր միայն, և իրաւամբ կոչուեցաւ որսորդ հոգիներու (venator animarum): Իւր ջերմեռանդն ուարտասուալից աղօթքներով արժանի կը լինէր արտաքոյ կարգի շնորհքներու : Անգամ մ'իրեն երեւցաւ Յիսուս արիւնալի վէրքերով, և հրաւիրեց զայն բերանը մօտեցընելու իւր կողին, վայելելու համար քաղցրութիւններն որք կը հոսին առատայորդ աստուածային Սրտէն : Ուրիշ անգամ մը եւս բազմաչորչար Փրկիչը կոչեց զայն, որպէս զի օգնէր իրեն խաչը կրելու : Մարդկային ազգի ոճիրներուն և անօրէնութեանց խաչն է այս, որոց համար Սուրբը դառն արցունք կը թափէր և կը հառաչէր շարունակ : Յաճախաղէպ էին վերացմունք և յափշտակութիւնք, յորս մեծ լոյսեր և նոյն իսկ մարգարէական ծանօթութիւններ կը ստանար աստուածային առատաձեռնութենէն : Ս. Պատարագի և Ս. Հաղորդութեան պաշտամունքէն վերջ, իւր խանդավառ ջերմեռանդութեան առարկայն էր Անարատ կոյսն Աստուածածին, որոյ ամենամաքուր Յղութեան, Ծննդեան, Վերափոխման և այլ տօներուն կը պատրաստուէր մասնաւոր մահացուցումներով և սերովբէաշունչ եռանդեամբ սիրոյ: Ինքն ալ ուրիշ երկնահանձար սուրբերու հետ համոզուած էր թէ Հրեշտակաց թագուհոյն տօները բացառիկ շնորհաց օրեր են : Յիսուսի երկրպագելի անունն արտասանած ժամանակ՝ կը սիրէր յաւելու «Ուրդի Մարեմայ», զոր գերագոյն Բարութիւնն ու իմաստութիւն հաճած է միացնել յաւէտ Մարդեղութեան և Փրկագործութեան խորհուրդներուն : Ամենէն նրբամիտ և խորաթափանց աստուածաբաններու և մեր Հայաստանեայց Ս. Հայրապետաց նման կը հաւատար թէ երկնից շնորհք մեզ կը տրուին ի

ձեռն ամենօրհնեալ Տիրամօր, ուժ կը պարտինք նոյն իսկ ամենասուրբ Հաղորդութիւնն, ըստ որում կ'երգենք դարերէ ի վեր. «Ուստի տուաւ հացն անմահութեան և բաժակ մեզ ուրախարար, տո՛ւք օրհնութիւն նմա հոգեւոր երգով :» (Շարական Հայ. Եկեղեցւոյ.)

Պէտք է յիշել նաև իւր ջերմեռանդութիւնն առ Ս. Անդրէաս Առաքեալ և առ Ս. Փրանկիսկոս Ասիզացի. որովհետեւ առաջինը մեծ ցանկութեամբ խնդրած էր չարչարուիլ ու մեռնիլ ի սէր Յիսուսի, և երկրորդն աւելի սիրած էր աղքատութիւնը քան աշխարհի բոլոր գանձերն ու վայելք :

Բայց իւր տառապալից կեանքը կը մօտենար վախճանին, ոյժերը կը սպառէին, և երկնից կը տենչար՝ իւր հոգին բուռն իղձերով : Վերջին հիւանդութեան բժիշկն ուզեց անկողին դնել զայն : «Ե՞ս փափուկ անկողնոյ մէջ,» ըստ Սուրբը «քա՛ւ լիցի. կ'ուզեմ և պարտիմ մեռնիլ մոխրոյ և ցփսիի վրայ : Ասկէ պակասինչ կրնամ ընել, քանի որ Յիսուս Քրիստոս իմ Փըրկիչս մեռաւ խա՛չի մը վրայ, խոցուած գամերով և փուշերով :» Մերժեց նմանապէս բժիշկներու խորհրդակցութեան գաղափարն, ըսելով. «Այս արտասովոր օգնութիւնները պատշաճ չեն իմինիս նման արհամարհելի մարմնոյ մը համար, և աղքատ կրօնաւորի մը կը բտւէ մի միակ բժիշկ :» Եկեղեցւոյ երեք խորհուրդներն ընդունելով, խաչելութիւն ի ձեռին, սիրաբորբոք մաղթանօք կը պաղատէր Աստուծոյ ներել աշխարհի մեղքերը և գթալ մեղաւորաց: 1547 օգոստ. 7ին աւանդեց իւր մաքուր հոգին ի ձեռս Արարջին: 67 տարեկան էր, և 23 տարիէ ի վեր հիմնած էր իւր արդիւնաշատ Միաբանութիւնը: Մարմինը կը գտնուի ցայսօր ի Նաբոլի Ս. Պողոսի մեծ Եկեղեցւոյն մէջ :

Թէադինեանք ունեցած են բացի Պօղոս Դ. գերագոյն Քահանայապետէն, բազմաթիւ եպիսկոպոսներ, արքեպիսկոպոսներ, ծիրանաւորներ, քաջուսումն աստուածաբաններ և անխոնջ առաքեալներ։ Պատմութիւնը կը յիշատակէ ի մէջ այլոց գերահռչակն Հայր Վենդորա, որ համաշխարհային հիացման արժանի եղած է իր պերճիմաստ քարոզներով, հոյակապ երկասիրութիւններով և իւր հրաշալիօրէն համայնագէտ հմտութեամբ։

Սրբազան խորաններու պատուոյն արժանացած են կամ պիտի արժանանան հաւանօրէն Ս. Անգրէառ Ավիլինեան, որոյ տօնը կը կատարէ եկեղեցին նոյեմբեր ամսոյ 10ին, վախճանած է 1608ին 88 տարեկան։ Երանելին Յովհաննէս Մոռինոն վախճանած ի Նաբոլի 1562ին։ Երանելին Պօղոս Պուրալի տ'Արէցցոյ, կարտինալ-արքեպս. Նաբոլիի, 1578 Յունիս 17ին(*)։ Երանաշընորհ Յովսէփ-Մարիամ Թոմազի, կարդինալ, վախճանած 1713 Յունուար 1ին։ Իւր քոյրն էր առաքինազարդ Մարիամ Խաչեցեալ։ Թէադինեան հաւատաւոր կոյս մ'է նաև Երանաշնորհ Օրսոլայ Պենինգազ, վախճանած ի 20 Հոկտ.ի 1618։

Այս համառօտ կենսագրութիւնը վերջացնելէ առաջըսենք թէ Ս. Կայետանոսի ջերմեռանդներն անոր արագահաս օգնութիւնը կը վայելեն յաճախ։ Իւր մահուան օրն իսկ ամեն խոռվութիւնք դադրեցան քաղաքին մէջ։ Ինչ որ վերագրուեցաւ Սուրբին բարեխօսութեան։ Ո՞վ կրնայ թուել բոլոր այն հրաշքներն որք գործուեցան և կը գործուին մինչեւ ցայսօր։ Հոգեսէր անձի մը որ անոր օգնականութիւնը կը հայցէր, Առւր-

(*) Երանաշնորհ Վինչենցիոս-Մարիամ Մորէլլի, արքեպիսկոպոս Օդրանդոյի, վախճանած 71 տարեկան։

քը երեւելով յանձնաբարեց ըսել 9 օր 9 Հայր մեր, 9
Ողջոյն և 9 Փառք Հօր։ Փորձով զիտենք արդարեւ թէ
ո՛րչափ զօրաւոր է այս իննօրեայ ջերմեռանդութիւնն
հոգեւոր և մարմնաւոր կարօտութեանց մէջ։

Աստուծոյ կամքն է որ փառաւորուի իւր ծառան
երկրի վրայ, այնպիսի ժամանակի մը մէջ մանաւանդ
որ աղքատութեան երկնահաճոյ առաքինութիւնն ա-
նարգուած է շատերէ, և ոսկւոյ ծարաւը կը մաշէ
սիրտն ու հոգին անհատից ինչպէս և ազգաց և ժո-
ղովրդոց։ Եւ ափսո՞ս, գտնուած են և մերմէջ ունայ-
նամիտ խմբագիրներ որոնք սրբապիղծ յանդգնութեամբ
և հայհոյութեամբ ընդդէմ աստուածախօս պատգամին՝
ժպրհած են գրելու։ «Խնդրեցէք նախ զդրամն, և այլն
ամենայն յաւելցի ձեզ...» Ո՞վ անհնարին և ազգաւեր
ամպարշտութեան։ պիտի չգտնուի՞ ուրեմն բարեպաշտ
ձեռք մը որ սանձ դնէ հայհոյիչ բերաններու...»


Ո՞հ, թոյլ չտանք որ աստուածային Նախախնա-
մութեան գաղափարն իսկ ցնորք մ'ըլլայ շատերու հա-
մար, չմոռնա՞նք երբեք թէ Հաւատոյ մասն է այն։
Անոր զօրութեամբ մեծամեծ գործքեր կատարեցին միշտ
ծշմարիտ քրիստոնեայք։ և անով չորս դարէ ի վեր
թէաղինեանք այնչափ արդիւնաւորապէս ծառայած են
մարդկութեան ոչ յեւրոպա եւեթ, այլ և մինչև ի Մոն-
կոլիա, Վրաստան, Արարիտ, Պարսկաստան, Հայաս-
տան, և մինչև Պոռնէոյի և Սումադրայի կղզիները։

Ներկայ երկասիրութիւնը քննելով կը հաստատեմ թէ հաւատոյ եւ բարոյականի գէմ ոչինչ կայ. որով անոր տպագրութիւնը կը կանայ օգտակար հանդիսանալ ընթերցողաց:

ՊՕՎՈՍ Ա. ՎԻՐԵՃԵՍՅԱՆ
Արքեպ. ընդհ. փոխանուրդ ի Կ. Պալիս

1 Յունիս 1934





BB Eyüp Sultan Halk ve Çocuk Kütüphanesi



ERM0541

255.07.02.01.06.00/

